

Skirbi pa Ruthy "Lady Ruth" Vrieswijk-Bergen

Bon dia yen di alegria



ORANJESTAD – Shonnan, asina tambe e Expo "Caranan di Ruthy" a yega na su final. E ultimo dia Ruthy a sinta meymey di su en total 17 caranan pinta pa varios artistanan local y internacional, inspirando un crenchi mas, y pensando seriamente pa bin den futuro cercano cu un "One woman show" Alegria di Ruthy #2 - E expo unico aki den su estilo tawata un parti bunita di Lady Ruth su "One woman show" Alegria di Ruthy "cu na luna di mei a alegria su dushi publico presente cu su canto, baile y su poemanan a la Ruthy.

Y despues por a gosa di e show aki varios bes na nos planta di television TeleAruba 13 & 23, danki na Biblio-

teca Nacional y Tele Aruba. Algun cu a puntra Lady Ruth pakico hopi di su coleganan poeta y of artista no a bay wak y apoya Lady Ruth tin cu tende como contesta cu Lady Ruth ta comparti, e semper a gusta, ta gusta y lo sigui gusta "comparti" y no competi manera varios di otro artistanan ta gusta haci y kisas talbes toch nan a sinti un sorto di competencia? E ta zona hasta un tiki pret, pasobra, ta su talentonan ricibi di su Creador cu el a desaroja, Lady Ruth no a bay ningun academia di arte, solamente e ta gusta canta, skirbi y baila. Locual el a comparti durante ya 44 aña den farandula. Pero e.o. si el a sigui lesnan despues cerca e Maestro Pintor King Lie Kwie, kende e siman aki ta bay tin un tremendo expo di su alumnonan den e salanan di Unoca.

Lady Ruth tin aanleg y hopi gevoel pa tur local ta arte y ta p'esey e por luci den nan den su mesun manera unico, toch? Di su humilde curason Ruthy ta gradici si e coleganan poeta artista cu tawata t'ey, specialmente Beach Lama, sra. Munye Winklaar

Oduber y Edjean Semeleer, kendenan a bis'e cu su show ta un "Waaaaaw". Y cu nan a keda impresionado con bunita, simpel y directo e tawata. Otronan a expresa na Ruthy cu Ruthy tin hopi durf y a tripi subi stage cu no un, pero 3 disciplina di arte sin hopi disciplina, uffiff, es decir, sin tawata stijf cu miedo di haci fout of di algo cu por a bay robes. Hasta Lady Ruth a tende for di un colega artista e palabranan mas o menos un dos siman prome cu e show "What if you fail"? Uffiff, no ta tur hende tin e mesun positivismo. Tin artista cu despues a bisa Ruthy cu "el a haci dolor" cu e no a bay.....tja, e tawata anuncia den tur corant, pero no ta tur hende ta lesa corant. Pero.....awe nos ta sigui

briya cu nos curason yen di gradicimento pa tur tur cos tur dia, cada momento, cada les, cada experiencia. Nos si lo sigui apoya coleganan poeta artista cantante bailado etc. etc., segun nos salud y tempo ta duna. Y atrobe lieve mensen, Lady Ruth no ta competi, e ta comparti !!!! "Get it?" Y awe den nos relato nos ta comparti mita di e 17 caranan, segun espacio den corant y spera di manda e otro mita otro siman Dios mediante, pasobra mi no sa cuanto espacio esaki tin lo tuma den nan tamaño scogi. Pa esnan cu a desea di bay bishita e expo, pero no tawata tin transportacion of moda di bay, specialmente pa boso, mi dushi amanan di cas. "Cu elegancia."

E CARANAN DI RUTHY "LADY RUTH" VRIESWIJK-BERGEN - Juni 2017

Mercedes, e bunita Mama di Ruthy no a gusta pa laga saka potret di su yuinan tempo nan tawata chikito. Ta te ora Ruthy tawatatin mas o menos 7 of ta 8 anja, su prome potret a wordo saca y un artista hulandes cu no ta corda su number, a pinta e cara di e hobencita Ruthy for di e prome potret ey riba un pida palo.

Despues te dia cu Ruthy a cumpli su di 15 anja di edad, e mes a bai laga saca "pas foto's" na un lugar den Oranjestad, serca e fotografo Oscar Figueroa, e casa di Marta Lacle di e grupo Pierewietje.

Y despues di varios anja dos artista a pinta e mesun cara aki di e pas foto, un na color pa un artista Venezolano cu tawata bishita cas pa cas pa pinta cara como su trabao y un artista local di cual number a keda un secreto, a pinte cu potlood riba carton, for di e mesun pas foto.

Despues ora Ruthy tawata casa caba, mama di dos yui homber, nan a bai Disneyworld na Orlando Florida Merca y eynan un artista "di caya" a pinta su cara riba un pida carton.

Djeynan Ruthy a sigui spaar su pinturanan di cara, pasobra unda ela bai di vakantie cu su casa y of cu su casa y su yuinan, y cu tawatatin un artista ta pinta cara di hende, e a laga nan pinte, pagando tin biaha unicamente 20 dollar.

Awendia Ruthy tin en total 17 pintura di su cara, pinta pa varios mas artistanan internacional, pero tambe artistanan local a wordo aserca dor di Ruthy pa nan pinta su cara. Entre nan: E artista mejicano Maria La Torre, William "Bill" de la Vega (Awe dfm, no ta corda di unda e ta) - Elvis Tromp - Gustaave Nouel - pero tambe Padu Lampe y Lio Boo'i a pinta cara di Ruthy.

Artistanan internacional, entre nan, un chinees, a pinta e cara di Ruthy te na San Francisco. Un a pinte na Alemania (Germany) - y un a pinte sinta den Central Park na New York.

Pero tambe un hoben di mas o menos 16 anja Samantha Bowen di Optica Moderna Aruba a pinta Ruthy su cara for di e mesun potret cu Juan Chabaya "Padu Lampe" a pinte.

Tambe, pasobra Ruthy no tin ruman muhe, ta 3 ruman homber e tin, y despues di a casa hanja dos yui homber, ela accentua cu su caranan pinta cu e ta un hende muhe meymey di hopi homber. E tawata gaba cu e tin 5 homber den su bida: "Su casa Johan, su dos yui hombernan Regnier y Jean Louis, su Tata Lucas Bergen y su Tata Celestial, Dios.

Ki bendicion berdad. Hasta Ruthy tin den su coleccion di caranan, un cara caricatura, pinta pa Leo Kuiperi (awe dfm) anto cu su dushi saludo di "Bon dia yen di alegria"! Por mira y sinti e diferente etapanan den bida di e artista multifacetico aki, Lady Ruth, como domestic engineer y of den su glamour total y of como deportista.

Ta spera di por topa cu un artista cu lo por pinta e cara di Ruthy cu su 60 primavera. Juni 2017.


